

Aatsitassarsiortoqarnissaanut aammalu suliffissuarujussualiortoqarnissaanut siunissami periarfissaalersinnaasut tunngavigalugit nunatsinnut tikisillugit suliaortitassatut pisariaqartinneqarumaartussat pillugit ersarissaassutaasumik nalilersuinnermullu atorneqarsinnaasumik Inatsisartut 2014-mi ukiakkut ataatsimiinneranni saqqummiunneqartussamik Naalakkersuisut nassuiaasiornissaannik aalajangiiffigisassatut siunnersuut. Nassuiaammi ilaatinneqassapput isumagininnikkut, kulturikkut aammalu ulluinnarni inuunermi kingunerusinnaasutut naatsorsuutigineqartut. Naalakkersuisut qinnuigineqarput nassuiaat naggaserneqassasoq sulisussamik pisariaqartitsinerup ersarissarneqarneranik tassungalu atatillugu kalaallit piginnaasaannut, sulilernissaminnut piareersimassusaannut aammalu nuttarsinnaanermut piareersimassusaannut tunngassuteqartut ersarissitinneqarnerannik.

(Inatsisartuni ilaasortat Knud Kristiansen aamma Gerhardt Petersen, Atassut)

Akissutitut allakkiq

(Inuussutissarsiornermut Aatsitassaqaqarnermullu Naalakkersuisoq)

Siullermeenera

Inatsisartut 2014-imi ukiakkut ataatsimiinneranni saqqumiunneqartussamik aatsitassarsiornermik suliniutaasinnaasunut aamma angisuunik suliniutaasinnaasunut atatillugu nunat allamiut sulisartut siunissami pisariaqartinneqarnissaannik ersarissaassutaallunilu misissueqqissaarisussamik Naalakkersuisut nassuiaasiornissaat pillugit Inatsisartut aalajangiussassaattut siunnersuummik Atassutip nassiuksaanut qujarusuppunga.

Atassummit aamma siunnersuutigineqarpoq nunanit allanit sulisartut amerlasuut tikinnerisigut isumagininnikkut, kulturikkut ulluinnarnilu inuunermi kingunerusinnaasutut naatsorsuutigisanik nassuiaat nassuiaasariaqartoq, aammalu nassuiaat sulisussamik pisariaqartitaqarnerup nunatsinni sulisartut piginnaasaannut, sulinissamut piareersimassusaannut nuttarsinnaassusaannullu sanilliussilluni ersarissaanissamik naggaserneqassasoq.

Sammisat misissorneqassasutut siunnersuutigineqartut ersarissaaviginissaat pingaaruteqartuuneri Naalakkersuisut tungaanit isumaqatiginnippugut, pingaartumik ukiuni takkuttussani allanguuterujussuit eqqarsaatigalugit. Suliniutitsinni sapinngisamik amerlanerpaanik najugaqarfinit sulisartut ilanngunnissaannik ilungersuutigiuakkatsinni aamma nunat allamiut sulisartut tikisitarinerini kingunissaasinnaasut erseqqissaaviginissaat pingaaruteqarpoq. Tamakku saniatigut nunatsinni sulisartut annertunerusumik erseqqissaaviginissaat, ilanngullugit piginnaasaat, sulinissamut piareersimassusaat nuttarsinnaassusaallu pingaartuupput.

Nunatsinni aatsitassarsiornermik suliaqarfimmik ineriartortitsissagutta nunat allamiut sulisartut pisariaqartuupput, taamaattumillu kikkunnut tamanut iluaqutaasussamik sulisartunik isumagininttoqarnerup tulluarnepaamik qanoq ingerlassinnaanerata misissorneqarnissaa Naalakkersuisut pingaartuutippaat.

Taamaattumik Atassummit siunnersuut akuersarneqassappat Naalakkersuisut sinnerlugit 2014-imi ukiakkut ataatsimiinnermi saqqummiunneqarnissaa siunertaralugu nassuiaasiornerup suliarinerata aallartinnissaa isumagissavara.

Siunnersuutip akuersissutiginnissaanik Naalakkersuisut innersuussipput.